

Suno Aur Amal Karo

Injeel : Mattā 7:15-29

[Īsā^(a.s) logon ko taaleem de rahe the, wo wahaan maujud logon se bole,] “Jhuṭe nabiyon se khabardaar raho. Wo tumhaare paas bheḍ kī khaal oḍh kar āeṅge, lekin aṅdar se wo kḥuṅkḥaar bheḍiyon kī tarah hī hoṅge.⁽¹⁵⁾ Tum in logon ko inkī harkaton se pahachaan loge. Kyā tum aṅgur ko kaaṅṭedaar ghaas-phuṅs se toḍte ho? Aur kyā tum aṅjeer ko kaaṅṭedaar jhaaḍiyon se toḍte ho? Naheen!⁽¹⁶⁾ Isī tarah se, acḥe peḍ acḥe phal paidā karte haiṅ aur kḥaraab peḍon me kḥaraab phal hī ugte haiṅ.⁽¹⁷⁾ Ek acḥā peḍ kabhī bhī kḥaraab phal naheen paidā kartā aur nā kabhī kisī kḥaraab peḍ me acḥā phal ugtā hai.⁽¹⁸⁾ Kḥaraab peḍon ko kaaṭ kar āg me pheṅk diyā jaaegā.⁽¹⁹⁾ To isī tarah se, tum jhuṭe nabiyon kī harkaton ko dekh kar unheṅ pahachaan jaaoge.⁽²⁰⁾

“Har inṣaan jo mujhe apnā maulā kahtā hai wo jannat me daaḥhil naheen ho paaegā. Naheen! Sirf wahī log jannat me jaaeṅge jo Allaah rabbul ālameen ko pasaṅd āne waale kaam karte haiṅ.⁽²¹⁾ Jab ākḥirī din āegā, to bahut saare log mujh se kaheṅge, ‘Yā maulā, hamne āpke naam se peshanagoeeyaan karī, gaṅdī ruhoṅ ko bhagaayā, aur āpke hī naam se bahut saare karishme kare haiṅ.⁽²²⁾ Lekin main unse saaf kah duṅgā, ‘E gunaahgaaron, mere paas se dur bhaag jao. Main tumheṅ naheen pahachaantā.⁽²³⁾

“Isle, merī baaton ko sunne aur us par amal karne waalā inṣaan bahut aqlmaṅd hai. Ek aqlmaṅd inṣaan apnā ghar chaṭṭaan par banaatā hai.⁽²⁴⁾ Tez baarish aur tez hawā uske ghar ko uḍā le jaane kī koshish kartī hai, lekin uskā ghar barbaad naheen hotā kyuṅki uske ghar kī neeṅw chaṭṭaan par rakhī huī hai.⁽²⁵⁾ Lekin jo bhī mere kalaam ko suntā hai us par amal naheen kartā, to wo us bewaquf inṣaan kī tarah hai ki jo apnā ghar ret par banaatā hai.⁽²⁶⁾ Baarish se āī baaḍh aur tez hawaaeṅ uske ghar ko uḍā le jaatī haiṅ aur wo purī tarah se barbaad ho jaatā hai.”⁽²⁷⁾

Īsā^(a.s) kī ye baateṅ sun kar bheḍ me maujud sabhī log hairaan rah gae.⁽²⁸⁾ Īsā^(a.s) logon ko shareeyat paḍhaane waale ustaadon kī tarah taaleem naheen dete the. Wo unko pure iḥṭiyaar ke saath taaleem dete the.⁽²⁹⁾